

Հավելված
ՀՀ կառավարության 2025 թվականի
դեկտեմբերի 18-ի N 1898-Լ որոշման

«Հավելված N 2
ՀՀ կառավարության 2020 թվականի
մայիսի 21-ի N 771-Լ որոշման

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ ՆԱԽԱՏԵՍԱԾ
80 ՄԼՐԴ ԴՐԱՄ ՀԱՆՐԱԳՈՒՄԱՐՈՎ ՏՆՏԵՍԱԿԱՆ ԵՐԿԱՐԱԺԱՄԿԵՏ
ՋԱՐԳԱՑՄԱՆՆ ՈՒՂՂՎԱԾ ԾՐԱԳՐԵՐԻ ՇՐՋԱՆԱԿՈՒՄ ԵՐԿՐՈՐԴ
ԾՐԱԳԻՐԸ

1. Ծրագրի առաջնային նպատակը Հայաստանի Հանրապետությունում ներդրումների աճը խթանելն է:

2. Ծրագրի շրջանակներում նախատեսվում է պետության մասնակցությունը «Ամբեր Կապիտալ Արմենիա» ընկերության (այսուհետ՝ ֆոնդի կառավարիչ) կողմից կառավարվող «ԵՄ-Հայաստան ՓՄՁ հիմնադրամ» Հատուկ Սահմանափակ Գործընկերության (ՀՍԳ) (այսուհետ՝ ֆոնդ)՝ 3 մլն ԱՄՆ-ի դոլարին համարժեք դրամ չափով՝ ներառյալ ֆոնդի կողմից կատարվող ներդրումները, ֆոնդի ծախսերը և կառավարչի վարձատրությունը՝ ֆոնդի փայերի ձեռքբերման (այսուհետ՝ ներդրումային պարտավորություն) եղանակով:

3. Հայաստանի Հանրապետության կառավարությունը ներդրումային պարտավորությունն իրականացնում է կապիտալի ներդրումների միջոցով՝ ըստ ֆոնդի կառավարչի կողմից ուղարկված ծանուցումների: Ընդ որում, յուրաքանչյուր 1 մլն ԱՄՆ-ի դոլարի չափով փայերի ձեռքբերումից հետո հաջորդ փայի ձեռքբերումը տեղի կունենա Հայաստանի Հանրապետության կառավարության որոշման հիման վրա՝ նախորդ մասնաբաժնի գումարի ներդրումների վերաբերյալ ներկայացված հաշվետվության արդյունքներով: Ֆոնդի կառավարիչն իրավունք ունի ներդրումային պարտավորության ֆինանսավորումն իրականացնել ներդրումներից ստացված շահույթից՝ հաշվանցելով այն ներդրումային պարտավորության հետ:

4. Ֆոնդը կկատարի ներդրումներ Հայաստանի Հանրապետությունում գործող մասնավոր ընկերությունների բաժնետիրական կապիտալի մեջ՝ ընդլայնման նախագծերի իրագործման, հիմնական միջոցների ձեռքբերման, տեխնիկական կարողությունների զարգացման և կորպորատիվ կառավարման համակարգի ստեղծմանն ուղղված քայլերի ֆինանսավորման նպատակով:

5. Ֆոնդին մասնակցությունն իրականացվում է ֆոնդի սահմանափակ գործընկերության համաձայնագրով (այսուհետ՝ ֆոնդի կանոններ) սահմանված կարգով: Ֆոնդի կանոններին Հայաստանի Հանրապետության կառավարությունը միանում է ի դեմս Հայաստանի Հանրապետության էկոնոմիկայի նախարարի և ֆոնդի գլխավոր գործընկերոջ՝ «Ամբեր կապիտալ ԵՄ-Հայաստան ՓՄՁ ԳԳ» սահմանափակ պատասխանատվությամբ ընկերության միջև կնքված բաժանորդագրության պայմանագրով: Ֆոնդի գործունեության և ներդրողների, այդ թվում՝ Հայաստանի Հանրապետության կառավարության՝ ֆոնդին մասնակցության հիմնական պայմանները սահմանված են ֆոնդի կանոններով, որը ներառում է հետևյալ պայմանները և կարգավորումները՝

1) ֆոնդում ներդրողների (այդ թվում՝ Հայաստանի Հանրապետության կառավարության) մասնակցության առավելագույն ժամանակահատվածը՝ 2032 թվականի հունվարի 31-ը, այդ թվում՝ առաջին 6 տարին հանդիսանում է ֆոնդի ակտիվ ներդրումային ժամանակահատված, իսկ դրան հաջորդող 6 տարին՝ ֆոնդի ակտիվների իրացման (լիկվիդացիա) և պետության փայերի մարման ժամանակահատված: Լիկվիդացիոն ժամանակահատվածում ներդրումներ կարող են կատարվել միայն ֆոնդի կանոններով հատուկ նախատեսված դեպքերում.

2) Հայաստանի Հանրապետության կառավարության ներդրումային պարտավորությունը՝ 3 մլն ԱՄՆ-ի դոլարին համարժեք դրամ.

3) ֆոնդի ներդրումային գործունեությունը, թիրախները և սահմանափակումները.

4) ֆոնդի սպասվող եկամտաբերությունը՝ 8%.

5) Հայաստանի Հանրապետության կառավարության մասնակցության կարգը և պայմանները մինչև վերջինիս բաժանորդագրությունը ֆոնդի կողմից կատարված ներդրումներին.

- 6) ֆոնդի կորպորատիվ կառավարման սկզբունքները.
 - 7) ֆոնդի շահույթի բաշխման կարգը.
 - 8) փայերի ձեռքբերումը.
 - 9) գլխավոր գործընկերոջ վարձատրությունը.
 - 10) ֆոնդի ծախսերի փոխհատուցումը ներդրողների կողմից և նոր ներդրողների մասնակցությունն արդեն իսկ կատարված ներդրումներին.
 - 11) ֆոնդի կառավարչի հաշվետվողականությունը ներդրողների (այդ թվում՝ Հայաստանի Հանրապետության կառավարության) նկատմամբ:
6. Ֆոնդին մասնակցության մանրամասները սահմանված են ֆոնդի կանոններով:»:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏԻ ԱՇԽԱՏԱԿԱԶՄԻ
ՂԵԿԱՎԱՐ

Ա. ՀԱՐՈՒԹՅՈՒՆՅԱՆ